

## Headlines

- 1 राष्ट्रपति द्रौपदी मुर्मू होंरें अज्ज पार्लियामेंट दी दोनें सभाएं दी सांझी बैठक गी संबोधित कीता।
- 2 सेना दी उत्तरी कमान दे कमांडर लेफ्टिनेंट जनरल एम.वी सुचेंद्रा कुमार होंरें उधमपुर जिले च फौज दे बकख-बकख ठकानें दा दौरा लाया ऐ। उनें इलाके च फौज दी संचालन तैयारियें दा जायजा लैता।
- 3 अमरनाथ जात्तरा दे श्रद्धालुएं दे पैहले जत्थे गी कल जम्मू थवां झंडी दस्सिये कश्मीर लेई रवाना कीता जाग। 29 जून गी यात्रा दी शुरूआत होआ करदी ऐ।
- 4 इस बरे 26 जून तोड़ी 50 लकख कोला मते श्रद्धालुएं श्री माता वैष्णो देवी दे दर्शन कीते न।

<><><><><><>

## President-Address

राष्ट्रपति द्रौपदी मुर्मू होंरें अज्ज आखेआ ऐ जे जम्मू-कश्मीर नै भारत दे दुश्मनें गी बनकदा जवाब दित्ता ऐ कीजे हाल च होए दे लोकसभा दे चुनावें च केंद्र शासित प्रदेश च रिकार्ड गिनती च मतदान होआ ऐ। उनें आखेआ जे जम्मू-कश्मीर च मतदान गी लेइयै कई दहाकें दे रिकार्ड टुट्टी गे'न। पार्लियामेंट दी दोनें सभाएं दी सांझी बैठक दौरान अपने अभिभाषण च राष्ट्रपति होंरें आखेआ जे पिछले चऊं दहाकें च कश्मीर च बंद ते हड़तालें करियै घट्ट मतदान होआ करदा हा ते मुलखे दे दुश्मन अंतरराष्ट्रीय मंचें पर इस कश्मीर दी राय दे तौर पर प्रचारित करदे हे। उवां इस बारी कश्मीर घाटी नै इस चाल्ली दी ताकतें गी बनकदा जवाब दित्ता ऐ। उनें आखेआ जे लोकें गी इस बारै पता ऐ जे छड़ा इयै सरकार उंदी आसें-मेदें गी पूरा करी सकदी ऐ। राष्ट्रपति होंरें आखेआ जे नमीं सरकार पार्लियामेंट दे औंदे इजलास च पैहला आम बजट पेश करन जा करदी ऐ जेड़ा औदी दूर तोड़ी असर पाने आहली नीतियें ते भविक्ख दे नजरिये दा इक्क असरकारी दस्तावेज होग। राष्ट्रपति होंरें अपने अभिभाषण च आखेआ जे दस्सें बरें च देश 11मीं थाहर कोला पंजमीं सब्बनें कोला बड्डी अर्थ बवस्था बनी गेआ ऐ। उनें आखेआ जे दुनिया दे बकख-बकख हिस्सें च लड़ाई ते आपदा दे बावजूद भारत नै एहू कमाल करी दित्ता ऐ। उनें एब्बी आखेआ जे उंदी सरकार भारत गी दुनिया दी त्री सब्बनें शा बड्डी अर्थ बवस्था बनाने लेई कम्म करा करदी ऐ। उनें प्रधानमंत्री ग्रामीण सड़क योजना तैहत 3.8 लकख किलोमीटर बनाई गेदी शिड़कें दा बी जिक्र कीता। राष्ट्रपति होंरें अशांत इलाकें च तेजी कन्नै विकास होने मगरा इनें इलाके वां मरहलेवार अफसपा गी हटाए जाने दी बी गल्ल कीती। पेपर लीक होने बारै गल्ल करदे होई राष्ट्रपति होंरें आखेआ जे सरकार नै इस मामले दी जांच कराने ते कसूरवारें गी सजा देने दा धेइया कीते दा ऐ। राष्ट्रपति होंरें नमें चुनोए दे सांसदें गी ममारखां दित्ति, उनें आखेआ जे देश च चुनावें दौरान कई रिकार्ड बनाए गेन ते समूलची दुनिया एहूदे बारै गल्ल करा करदी ऐ।

<><><><><><>

## Army-Com Visit

सेना दी उत्तरी कमांड दे कमांडर लेफ्टिनेंट जनरल एम.वी सुचेंद्रा कुमार होंरें उधमपुर जिले च बकख-बकख ठकानें दा दौरा लाया ते इलाके च फौज दी संचालन सरबन्धी तैयारियें दा जायजा लैता। अधिकारियें मताबक जम्मू क्षेत्र च सुरक्षा हालात ते औंदी अमरनाथ जात्तरा गी दिक्खदे होई लेफ्टिनेंट जनरल होंरें एहू दौरा लाय ऐ। उत्ती कमांड नै अज्ज एक्स पर लिखी दी इक्क पोस्ट च दस्सेया जे फौज दे कमांडर होंरें उधमपुर च सेना दे मकामी ठकानें दा दौरा लाया ते संचालन तैयारियें दा जायजा लैता।

<><><><><><>

## Parliament-Proceeding

राष्ट्रपति द्रौपदी मुर्मू हुंदे अभिभाषण दी इक कॉपी अज्ज लोकसभा ते राज्यसभा च पेश कीती गेई। राष्ट्रपति होंरें पार्लियामेंट दी दोनें सभाएं दी सांझा बैठक गी संबोधित कीता। स्पीकर ओम बिरला होंरें एब्बी घोषणा कीती जे कांग्रेस सांसद राहुल गांधी होंरें गी लोकसभा च विरोधी धड़ें दे लीडर दे तौर पर मानता दित्ती गेई ऐ। मगरा सभा गी दिनें लेई मुअत्तल करी दित्ता गेआ।

<><><><><><>

## Prez. Address

विपक्ष नै अज्ज संसद दे सांझे इजलास गी कीते गेदे राष्ट्रपति द्रौपदी मुर्मू हुंदे संबोधन दी नुक्ताचीनी कीती। संसद दे बाहरें मीडिया कन्नै गल्लबात च कांग्रेस दे सांसद तारिक अनवर होरें आखेआ जे इस संबोधन च गरीबी, महंगाई ते बेरोजगारी सने असल मुद्दें दी अनदिक्खी करिए छडा सरकार दी उपलब्धिएं गी उजागर कीता गेआ। कांग्रेस दे इक होर नेता प्रमोद तिवारी होरें आखेआ जे एहदे च किश नमां नेई हा। संबोधन च नीट दी अनियमितताएं दा कोई जिक्र नेई हा। समाजवादी पार्टी प्रमुख होरें आखेआ जे सरकार 5मीं सब्बनें थवां बड्डी अर्थ बवस्था होने दी गल्ल करदी ऐ पर बेरोजगारी ऐ, करसान तकलीफ च न ते लाह किश चुने दे लों गी थहोआ करदा ऐ।

<><><><><><>

## PIB-Vartalaap-NCL

प्रेस सूचना ब्यूरो जम्मू आस्सेआ अज्ज प्रैस क्लब जम्मू च पत्रकारें लेई इक मिनी वार्तालाप प्रोग्राम लोआया गेआ। इस प्रोग्राम दा मकसद पत्रकारें गी हाल च आने गेदे 2023 बरे दे नमें आपराधिक कनूनें कन्नै वाकिफ कराना हा। एहू नमें आपराधिक कनून पैहली जुलाई 2024 सवां लागू होआ करदे न। स्हाढे संवाददाता जगमोहन शर्मा हुंदे मताबक माहिरें नमें आपराधिक कनूनें दे बक्ख-बक्ख पैहलुएं बारै ब्यौरेवार जानकारी दिती। पी.आई.बी दे निदेशक गुलाम अब्बास होरें पत्रकारें दा सुआगत कीता। एहदे मगरा पी.आई.बी दे माहिर जाकिर नजीर होरें इक्क पावर प्वाइंट प्रस्तुति दिती। वार्तालाप प्रोग्राम दे पैहले सत्र च सीनियर वकील श्री रंजीत सिंह जम्वाल होरें किट्टे गी संबोधित कीता। एस.पी नार्थ जम्मू शिवम सिद्धार्थ जेडे इस मौके पर मुख परौहने हे, उनें भारती न्या सरिस्ते च होने आहली तब्दीली बारै गल्लबात कीती। पत्रकारें कन्नै गल्लबात करदे होई एस.पी नार्थ शिवम सिद्धार्थ होरें आखेआ जे।

<><><><><><>

## New Oath MP

बिहार, झारखंड ते मध्य प्रदेश दे 6 नमें चुनोए दे सांसदें अज्ज राज्यसभा सदस्य दे तौर पर सगंध लैती। इनें नमें सांसदें गी राज्यसभ दे सभापति जगदीप धनखड़ होरें सगंध दोआई। कांग्रेस सांसद अखिलेश प्रसाद सिंह, जे.एम.एम दे डॉ. सरफराज अहमद ते बीजेपी दे प्रदीप कुमार वर्मा, बंसीलाल गुर्जर, माया नारोलिया ते बालयोगी उमेशनाथ होरें सदन दे सदस्य दे तौर पर सगंध लैती।

<><><><><><>

## CBI NEET Arrest

सीबीआई नै नीट यू.जी म्तेहान च कथित बे-जाबतिएं दे सरबंधै च 2 लोकें गी गिरफ्तार कीता ऐ। सूत्रें मुजब इनें दौनें आरोपिएं गी बिहार दे पटना थवां हिरासत च लैता गेआ। नीट-यू.जी पेपर लीक मामले दी जांच सीबीआई करा'रदी ऐ। सीबीआई सोमवार बिहापर पुलस दी आर्थिक अपराध इकाई दे दफ्तार पुज्जी ते मामले दी जांच शुरू कीती।

<><><><><><>

## SANJY-2024

सालाना श्री अमरनाथ जी दी जात्तरा दा पैहला जत्था जम्मू थवां कश्मीर लेई कल रवाना होग। इस ब'रे दी श्री अमरनाथ जी दी जात्तरा 29 जून थवां शुरू होआ रदी ऐ। जम्मू दे भगवती नगर आले आधार शिविर पर श्रद्धालुएं दा औना शुरू होई गेआ ऐ। इत्थुआं इनें श्रद्धालुएं गी सख्त सुरक्षा बंदोबस्तें हेठ बालटाल ते अनंतनाग आले आधार शिविर लेई रवाना कीता जाग। यात्रा बड्डुलै 4 बजे भगवती नगर आले यात्री निवास थवां रवाना होग। सैकड़ां बद्दे केंद्री सशस्त्र पुलस बल यात्रा ड्यूटी पर तैनात कीते गए न। 85 किलोमीटर लम्में श्रीनगर-बालटाल आधार शिविर ते पहलगाम काजीगुंड आधार शिविर आली शिडक दी निगरानी लेई सी.ए.पी.एफ दियां टीमां लाइयां गेदियां न। प्रशासन आस्सेआ मनीगाम ते मीर बजार थाहर यात्रा लेई आरजी शिविर बनाए गेदे न अजें तगर 3 लक्ख 50 ज्हार श्रद्धालुएं अमरनाथ जी दी जात्तरा लेई पंजीकरण कराया ऐ।

<><><><><><>

## SMVD-Yatra

श्री माता वैष्णो देवी जी दी जात्तरा भारत च प्रसिद्ध तीर्थ स्थानें च शामिल ऐ। इस बरे अजें तगर श्री माता वैष्णो देवी जी दे दर्शनं गितै 50 लक्ख थवां बहू श्रद्धालु आए ना। पिछले बरे इससै अवधि दौरान 48 लक्ख थवां बहू श्रद्धालु आए एहे। एह गिनतरी अपने आपा च इक बड्डी उपलब्धि ऐ। इस गिनतरी कन्नै इस तीर्थ स्थान प्रति लोकें गी श्रद्धा ते आस्था दा पता लगदा ऐ। त्रिकुटा पहाड़िं च स्थित इस पवित्र श्राइन च लक्खां बहे लोकें दी श्रद्धा ते आस्था जुडी दी ऐ।

<><><><><><>

## Amarnath-Yatra

श्री अमरनाथ जी जात्तरा दी तयारिं गी खीरी रूप देने लेई श्रीनगर दे डिप्टी कमिशनर डॉ. बिलाल मोहिउद्दीन भट्ट होरें पैथ चौक स्थित श्रीनगर आले आरजी शिविर दा दौरा लाया। इस मौके पर उंदे कन्नै होर दुए अफसर बी मौजूद हे। डिप्टी कमिशनर होरें रौहने-बौहने, बिजली, पानी, साफ-सफाई ते लंगर सने होरनें सुविधाएं दा जायजा लैता। इस मौके पर बोलदे होई डिप्टी कमिशनर होरें आखेआ जे शिविर दी समर्थ गी बदाया गेआ ऐ ते श्रद्धालुएं दे रश दे चलदे 5 जहार श्रद्धालुएं गी इत्थे ठहराने दी बवस्था ऐ। श्रद्धालुएं लेई जात्तरा गी सुविधाजनक बनाने आस्तै सारे इंतजाम पैहले सोयां करी लैते गेदे ना। उनें आखेआ जे जिला प्रशासन श्रीनगर ते सिविल समाज श्रद्धालुएं दे सौआगत लेई पूरी चाल्ली तैयार ऐ।

<><><><><><>

## Yatra Meet Samba

इस बरे आली श्री अमरनाथ जी दी जात्तरा गी सुचारू ते रमानदारी आले ढंगै सिर करोआने लेई सांबा दे डिप्टी कमिशनर अभिषेक शर्मा होरें डी.सी दफ्तर च इक बैठक लाइए इंतजामें दा जायजा लैता। उनें जिले च यात्रिं लेई बनाई गेदी 26 बक्ख-बक्ख थाहरें ते आर.एफ.आई.डी कार्ड जारी करने आली दोनें थाहरें दा बी जायजा लैता। उनें यात्रुं लेई यात्रा गी सुचारू ते रमानदारी आली बनाने लेई साफ-सफाई, सुरक्षा, बिजली, पानी, रौहने-बौहने दी सहूलत, सेहत, पीने आले पानी, ट्रैफिक प्रबंधक ते होरनें दुइं सुविधाएं दा निरीक्षण कीता।

<><><><><><>

## Niti Ayog Health

नीति आयोग दे मेंबर डॉक्टर. वी.के पाल होरें अज्ज भारत च इक सेहत गतिविधियें लेई पर्यावरण सरबंधी कनूनी मूल्यांकन बारै दऊं रोजा राष्ट्रीय परामर्श प्रोग्राम दा उद्घाटन कीता। नमीं दिल्ली च लगगे दे इस प्रोग्राम दौरान सेहत ते परिवार दी भलाई-बेहतरी सरबंधी मंत्रालय दे सचिव अपूर्व चंद्रा होर बी मौजूद हे। इस परामर्श प्रोग्राम दा मकसद सेहत दे क्षेत्र च असर पाने आहले पर्यावरण कारणें ते कनूनी कारणें दा पता लाना ऐ।

<><><><><><>

## Block Diwas Jammu

जम्मू दे डिप्टी कमिशनर सचिन कुमार वैश्या होरें डंसाल च आयोजित ब्लाक दिवस कार्यक्रम च हिस्सा लैता। बैठक दौरान मकामी मसले ते होर दुए मामले गी पुट्टेआ गेआ जेदे च बिजली ते पीने आले पानी दी सप्लाई, शिडक बगैरा बी शामिल हियां। डिप्टी कमिशनर होरें सारे दे मसलें गी ध्यानै नै सुनेआ ते मुतल्लका अफसरें गी हिदायत कीती जे फौरी तौर पर इंदे पर ध्यान देना ते समें सिर इंदा हल करना। उनें भरोसा दोआया जे सारे जायज मसलें दा हल कीता जाग। मगरा डिप्टी कमिशनर होरें बुनियादी सेहत केंद्र जिंद्राह दे कम्मकाज दा जायजा लैता। उनें जिले च जल जीवन मिशन तैहत चला रदे कम्में दा बी जायजा लैता।

<><><><><><>

## Advani-Discharged

भारती जनता पार्टी दे वरिष्ठ नेता लाल कृष्ण आडवाणी होरें गी अज्ज नमीं दिल्ली दे अखिल भारती आयुर्विज्ञान संस्थान एम्स थवां छुट्टी देई दिती गेई। उम्मी सरबंधी कारणें करी उनेंगी कल रातीं अस्पताल च भर्ती करोआया गेआ हा। 96 बरें दे नेता होरें गी डॉक्टरें दी निगरानी च रक्खेआ गेदा हा।

<><><><><><>